

EAerako aurreikuspenak (2010ko ekaina)

Kanpoko testuinguru horrekin eta argitaratu diren azken adierazleekin, Euskal Autonomia Erkidegoak datozen urteetan izango dituen hazkunde tasak eguneratu dira. Ekonomia eta Plangintza Zuzendaritzak estimatu duenez, EAEko ekonomia %0,5 haziko da 2010. urtean eta zerbait gehiago lortuko du 2011. urtean, urte horretako hazkunde tasa %1,6ra iritsiko baita. Beraz, suspertzeko erritmoa ahula izango dela aurreikusten da.

Eskaintzaren ikuspegitik, industria jarduerak hobekuntza arina izango duela aurreikusten da, sektore horretako balio erantsia %0,9 haziko baita 2010. urtean. Industriaren susperraldia 2011n gauzatuko da, urte horretako hazkunde tasa %2,3ra iritsiko baita. Eraikuntzaren balio erantsiak nahiko garrantzitsua izango den beherakada nozituko du eta ez da urte arteko aldakuntza tasa positiboetara itzuliko aztertu den epealdi osoan. Etxegintzaren eskari apalak eta gainontzeko atalen gainbehera konpentsatzeko obra publikoak erakusten duen ezintasunak eraikuntza arloko jardueraren murrizketa nabarmena eragingo dute. Higiezinaren arloko doikuntza lortzeko ezinbestekoa da bizitegien salneurria gehiago jaitea, eskaria eta eskaintza orekatzeko. EAEko ekoizpen egituran pisu handiena duen sektorea, hots, zerbitzuak %1,0 haziko dira 2010. urtean eta tasa hori %1,8ra iritsiko da 2011. urtean. Hazkundearen suspertzea biziagoa izango da zerbitzu pribatuetan, zeren eta aurrekontuetako murrizketek zerbitzu publikoen portaera ahulagoa eragingo baitute.

Barne eskariaren osagai guztiek, salbuespen bakarra administrazio publikoetako kontsumoa delarik, hazkunde tasa motelak izango dituzte datozen urteetan. Familien konfiantzak izan duen igoera txikiak aberastasun efektu negatiboa eta lan merkatuaren bilakaeraz dauden aurreikuspen ezkorrek konpentsatuko ditu. Azken elementu horiek eragina izan dute EAEko familien portaera zuhurrean, irabazten dutena aurreztu nahiago dutelako, ekonomiaren egoera zalantzaz beterik dagoelako eta mehatxu arriskutsuak daudelako. Barneko azken kontsumoaren hazkundera %0,2 izango da 2010. urtean eta %1,0ra helduko da 2011n, aurreikuspen honen arabera.

Kapitaleko eraketa gordinak bizkortzeko joera arina ezagutuko du kontuan hartu den epealdian. Barneko eta kanpoko eskarien gorakadak agregatuaren hazkundera bultzatuko du. Nazioarteko ekonomiarentzat egin diren aurreikuspenak eta EAEko industriak kanpoarekiko duen irekiera gradu garrantzitsua kontuan hartuta, Europarentzat aurreikusten den susperraldiak bultzada nabarmena emango dio EAEko ekoizpenari. Ekonomia eta Plangintza Zuzendaritzaren aurreikuspenek tasa negatibotan (%-0,7)

kokatzen dute agregatu horren 2010eko hazkunde tasa, baina emaitzak hobetoagoak izango dira 2011. urtean eta %2,1eko gehikuntza lortuko du

EAE-KO EKONOMIARENTZAKO AURREIKUSPENAK (2010eko ekaina)


Urte arteko aldakuntza tasak

	10.I	10.II	10.III	10.IV	2010	11.I	11.II	11.III	11.IV	2011
BPG	-0,6	0,8	0,8	1,1	0,5	1,3	1,5	1,7	1,9	1,6
Azken kontsumoa	-0,3	0,1	0,5	0,7	0,2	0,6	0,9	1,2	1,2	1,0
Kontsumo pribatua	-0,6	0,0	0,8	1,1	0,4	1,1	1,2	1,4	1,4	1,3
Kontsumo publikoa	0,5	0,4	-0,8	-0,9	-0,2	-0,9	-0,3	0,3	0,7	0,0
Kapital eraketa gordina	-4,7	-0,3	0,8	1,4	-0,7	1,4	1,9	2,4	2,8	2,1
Barne eskariaren ekarpena	-1,5	0,0	0,6	1,1	0,1	1,2	1,2	1,6	1,7	1,4
Kanpo saldoaren ekarpena	0,9	0,8	0,2	0,0	0,4	0,1	0,3	0,1	0,2	0,2
Lehen arloa	-19,5	-10,4	-16,9	-7,8	-13,6	2,1	4,2	5,6	6,9	4,7
Industria	-1,6	1,4	1,8	1,9	0,9	2,0	2,1	2,3	2,7	2,3
Eraikuntza	-6,5	-3,4	-3,0	-2,5	-3,8	-2,3	-2,1	-2,1	-1,3	-2,0
Zerbitzuak	0,7	1,2	1,1	1,1	1,0	1,6	1,8	1,9	2,0	1,8
Balio erantsi gordina	-0,7	0,7	0,8	0,9	0,4	1,3	1,5	1,7	1,9	1,6
Ekoizkinen g. zerga garbiak	0,0	0,6	1,0	1,5	0,8	1,8	1,9	2,1	2,1	2,0
BPGren deflatoea	0,9	1,0	1,3	1,4	1,2	1,8	1,9	2,1	2,3	2,0
Enplegua	-1,9	-0,9	-0,5	-0,1	-0,9	0,0	0,3	0,6	0,8	0,4
Langabezia tasa	8,9	9,2	9,4	9,5	9,3	9,4	9,2	9,2	9,0	9,2

Iturria: Ekonomia eta Plangintza Zuzendaritza.

Inguruneko ekonomien susperraldiaren ondorioz, bai esportazioek bai inportazioek gora egingo dute. Inportazioak esportazioak baino gutxiago haziko direnez, kanpo arloak ekarpen positiboa egingo dio BPGren hazkunderari 2010ean eta 2011n. Merkataritzako bazkideen ekonomia egoera hobean egongo denez eta merkatuetan konfiantza itzuliko denez, merkataritzako fluxuak areagotuko dira eta EAE horretaz baliatuko da nazioarteko merkatu nagusietan kokatuta dagoelako.

EAEko BPGren bilakaera eta ekarpenak Urte arteko aldakuntza tasak



Fuente: Eustat eta Ekonomia eta Plangintza Zuzendaritza.

Ekonomia jarduerarentzat estimatu den bilakaera ahulak enplegu galerak ekarriko dizkio EAEko ekonomiari, baina galera horiek aurreko urtekoak baino txikiagoak izango dira. Hain zuzen ere, 2010. urterako aurreikuspenek 9.000 lanpostu inguru galduko direla estimatu dute. 2011. urtean, tuneletik irteten hasiko da eta ekonomiaren susperraldiak enpleguaren igoera txiki bat ekarriko du. Langabezia tasak etengabeko gorakada izango du 2010. urtean, epealdi osoan zehar lanik gabeko pertsonen kopuruak gora egingo duelako. Aitzitik, 2011n langabezia tasa gutxitzeko joera ahula ezagutuko da.

Ekonomia eta Plangintza Zuzendaritzak osatu duen eszenategi makroekonomikoa nazioarteko ingurunearen bilakaeraz, datozen urteetan izango diren prezioez, euroak dolarraren aldean izango duen truke tasaz eta Europako Banku Zentralak bere moneta politikan ezarriko dituen interes tasez eginiko hainbat hipotesitan oinarritzen da.

Datozen urteetarako, ez da inflazio altuko eszenategirik aurreikusten. BPGren deflatoarea %1,2 izango da 2010ean eta %2,0aren ingurukoa 2011n. Ezaugarri hori komuna da Euroguneko eremu guztietan eta, horren ondorioz, EBZk moneta politikak planifikatzeko orduan ekonomiaren hazkundeari laguntza ematea helburu nagusitzat hartu dezake, horretarako kreditua erraztuz, prezioaren egonkortasunaren ordeztuz. Aurreikuspen gehienek epe laburreko interes tasak etengabe baina oso gutxi igoko direla seinalatzen dute.

Estimazioek epe laburreko tasak %1,0aren inguruan kokatzen dute 2010eko erdialdean eta %1,5aren inguruan 2011ko lehen hilabeteetan. Igoera neurritsu izango da eta eskari erreala suspertuko den eta prezioen joerak finkatzen diren heinean gauzatuko da. Izan ere, interes tasen zuzenketa horrek susperraldia errealdaren abisua emango du.

KPI-REN AURREIKUSPENAK (2010eko maiatza)


Urte arteko aldakuntza tasak

	10.I	10.II	10.III	10.IV	2010	11.I	11.II	11.III	11.IV	2011
AEB	2,3	1,7	1,1	0,7	1,5	0,7	0,9	1,2	1,1	1,0
Eurogunea	1,1	1,6	1,7	1,8	1,5	1,8	1,5	1,4	1,3	1,5
Espainia	1,1	1,4	1,5	1,7	1,4	1,5	1,4	1,1	0,8	1,2
EAE	1,0	1,2	1,2	1,5	1,2	1,8	1,5	1,3	1,1	1,4

Iturria: Flores de Lemus Institutua (Carlos III Unibertsitatea).

KPIren bilakaera

Urte arteko aldakuntza tasak



Iturria: Eurostat, INE eta Flores de Lemus Institutua (Carlos III Unibertsitatea).

Truke tasari dagokionez, gaur egungo aurreikuspenak aurreko hiruhilabeteak baino euro ahulago bat hartzen du kontuan. Estaturatuaren ekonomia suspertze biziagoa eta interes tasen arteko aldea murriztu izana izango dira dolarraren balioa euroaren aldean areagotuko diren alderdiak. Hala eta guztiz ere, euroaren kasuan, herrialde batzuek krisian egin duten

kudeaketa txarrak eta erreformen sakontasun ezak merkatuetan eragin dituen zalantzek europar diruaren balio galera areagotu dute. Eurogunean neurri bateratuak onartzeak euroaren ahulezia epe laburrean leunduko duela aurreikusten da, dolarrarekiko truke tasa 1,28aren eta 1,20aren arteko urkila batean egonkortuz. Hala ere, neurri horiek merkatuetan sortuko duten konfiantza izango da euroaren bilakaera baldintzatuko duena. Euroguneko doikuntza sendoa eta sakona bada, diru bakarren balioak gora egingo du. Bestela, dolarrarekiko parekotasuna itzuliko da, 2002ko amaieratik inoiz bizi ez den egoera baita hori.